

每週經課朗誦經文（巴克禮台語漢字）2014/12/14

共同經課-1 以賽亞書第六十一章一節～四節，八節～十一節

1 主耶和華的神臨到我；因為耶和華用油抹我，互我傳福音互喪鄉的人，差我醫好傷心的人，報告受掠的得著解放，受關的出監牢；2 報告耶和華歡喜的年，及咱的上帝報讎的日；安慰一切悲哀的人，3 佇錫安悲哀的人用花帽賞賜伊，來替火灰；歡喜的油來替悲哀；謳啫的衫來替憂愁的心；互 in 稱做「公義的樹」，就是耶和華所栽的，來顯明家己的榮光。4 in 欲起造古早拋荒的所在，建立早前冷靜的位處，也欲修理拋荒的城，就是代代冷靜的位處。8 因為我——耶和華愛公平，怨恨不義的搶劫；我欲照誠實報應 in，也欲及 in 立永遠的約。9 in 的後裔欲佇列國中互人識伊；in 的子孫佇眾百姓中也是按呢。見若看見 in 者欲認 in 是耶和華賜福的後裔。10 我因為耶和華大大歡喜；我的心神因為我的上帝就快樂。因為伊用拯救做衫給我穿，用公義做袍給我穿，親像新子婿戴媛的帽，閣親像新娘妝飾寶物。11 因為土地怎樣互百項的五穀發芽，園怎樣互所種的發生，主耶和華也欲按呢互公義及謳啫發生佇萬國的面前。

共同經課-2 詩篇一百二十六篇

1 耶和華導許個受掠的人倒轉來錫安，彼時咱親像眠夢。2 彼時咱的嘴哈哈笑、咱的舌出大歡喜的聲，外邦中就有人講：耶和華為 in 行大事！3 耶和華有為咱行大事，咱就歡喜。4 耶和華啊，求你互阮受掠的人倒轉，親像南方的溪水閣流。5 流目屎撒種子者，欲出歡喜的聲收割！6 彼個流目屎帶種子出去者，的確欲帶伊的稻把歡歡喜喜倒來！

共同經課-3 帖撒羅尼迦前書五章十六節～二十四節

16 著常常歡喜，17 著祈禱無息，18 凡事感謝；因為此個是上帝惦佇基督耶穌向恁的旨意。19 毋通拍熄聖神；20 毋通看輕先知的話。21 凡事著察驗，好的著執守，22 著離開逐樣的歹。23 願平安的上帝家己互恁一盡成聖！閣願恁的神及魂以及身軀，佇咱的主耶穌基督閣來的時，攏得著保全，無通嫌！24 召恁的是信實，伊也欲成伊。

共同經課-4 約翰福音一章六節～八節，十九節～二十八節

6 有一人，對上帝差來，名叫約翰。7 此個人來做干證，是欲為著光做干證，互眾人對伊來信。8 伊毋是彼個光，是欲為著光做干證若定。19 約翰的干證記佇下底：猶太人對耶路撒冷差祭司及利未人就近伊來問講：「你是是誰。」20 彼時約翰承認，無隱瞞，伊承認講：「我毋是基督。」21 閣問伊：「這是怎樣？你是以利亞嗎？」伊講：「毋是。」「你是彼個先知嗎？」應講：「毋是。」22 就給伊講：「你是是誰，互阮通回覆差阮的。你著講家己，是怎樣？」23 講：「我就是啲叫佇曠野者的聲講：『修直主的路』，親像先知以賽亞所講的。」24 許個人就是法利賽人所差的；25 in 閣問伊講：「你若毋是基督，亦毋是以利亞，亦毋是彼個先知，怎樣行洗禮啊？」26 約翰應伊，講：「我是用水行洗禮，有倚佇恁中間的，恁毋識伊，27 伊就是隨尾我來的，就解伊的鞋帶我亦袂堪得。」28 諸個事行佇約但外的伯大尼，就是約翰行洗禮的所在。